

欽定四庫全書

子部

普濟方卷十二



南京中医药大学图书馆版权所有

欽定四庫全書

普濟方卷十

運氣圖

普濟方

明周王朱橚撰

甲辰歲辰圖



太陽寒水司天太陰濕土在泉中見太宮土運歲土太
過氣化運行先天太宮下加太陰太過而加同天符又
土運臨辰是謂歲會氣之平也平土之歲命曰備化之
紀氣協天休德流四政五化齊修其氣平其性順其用
高下其化豐滿其政安靜其候溽蒸其令濕其類土其
應長夏其穀稷其果棗其實肉其蟲裸其畜牛其物膚
其色黃其味甘其音宮其數五其在人也其藏脾其主
口其養肉其病痞此運歲所生也天地之氣寒化在上

左動化右清化故天政所布其氣肅甘化在下左明化
右灼化故地氣靜而其令徐水土合德上應辰星鎮星
其穀玄黔寒臨太虛其政大舉陽氣不令澤無陽燄則
火發待時少陽中治時雨迺涯止極雨散還於太陰雲
朝北極濕化迺布澤流萬物寒敷于上雷動于下寒濕
之氣交民病寒濕發肌肉萎足痿不收濡瀉血溢歲半之
前太陽主之太陽有本標之化寒政大舉熱氣時應者
天氣得中也歲半之後太陰主之太陰之化從本雨濕

甚者地氣之應也寒化六濕化五是謂正化之日鱗蟲靜俛
蟲育是謂歲物所宜鱗蟲不成燥毒不生是謂地氣所制
平土之歲本不資化源以運與地氣臨於戌歲有三土天令
甚虛宜先資化源以助於水所謂抑其運氣扶其不勝無
使暴過而生其疾也食玄穀之穀以全其真避歲之虛邪以
安其政以苦熱調上以苦溫調下運土在中亦以苦溫調之
運同寒濕化宜燥熱治之常也初之氣自癸卯年大寒日
寅初至是歲春分日子初凡六十日八十七刻半主位太


角木客氣少陽火中見土運少陽中治以行春令地氣遷
氣大溫草迺早榮民迺厲溫病迺作身熱頭痛嘔吐肌腠
瘡瘍宜治少陽之客以醎補之以甘瀉之以醎災之歲穀
宜玄間穀宜豆則火不為邪二之氣自春分日子正至小
滿日戌正凡六十日有奇主位少徵火客氣陽明金中見
土運金土相和大涼反至民迺慘草迺遇寒火氣遂抑民
病氣鬱中滿寒迺始宜治陽明之客以酸補之以辛瀉之
以苦泄之歲穀宜玄間穀宜黍則燥不為邪三之氣自小

滿日亥初至大暑日酉初凡六十日有奇主位少徵火
客氣太陽水中見土運天政布寒氣行雨迺降民病寒
反熱中癰疽注下心熱瞖悶不治者死宜治太陽之客
以苦補之以鹹瀉之以苦堅之以辛潤之歲穀宜玄間
穀宜稷則寒不為邪四之氣自大暑日酉正至秋分日
未正凡六十日有奇主位太宮土客氣厥陰木中見土
運歲土得位風氣居之風濕交爭風化為雨迺長迺榮迺成
民病大熱少氣肌肉萎足痿注下赤白宜治厥陰之客

以辛補之以酸瀉之以甘緩之歲穀宜齡間穀宜稻則
風不為邪五之氣自秋分日申初至小雪日午初凡六
十日有奇主位少商金客氣少陰火中見土運土能生
金氣位相和陽復化草迺長迺化迺成民迺舒宜調少
陰之客以醎補之以甘瀉之以酸收之歲穀宜齡間穀
宜豆則熱不為邪終之氣自小雪日午正至大寒日
辰正凡六十日有奇主位太羽水客氣太陰土中見土
運氣與運符地氣正濕令行陰凝太虛埃昏郊野民迺

悽慘寒風以至反者孕迺死宜治太陰之客以甘補之
以苦瀉之以甘緩之歲穀宜齡間穀宜麻則濕不為邪
是氣也不可犯涼司氣以涼故也歲氣雖平或有邪氣
則中執法經曰中執法者其病速而危也

乙巳歲圖



厥陰風木司天少陽相火在泉中見少商金運歲金不
及氣化運行後天上角與正角同諸同正歲氣化運行
同天氣風化行於上左灼化右藏化故天氣擾而其政撓苦
化司於地左素化右柔化故地氣正而其令速風生高
遠炎熱從之雲趨雨府濕化迺行風火同德上應歲星
熒惑其穀蒼丹間穀言太宮太羽者其耗文角品羽風
燥火熱勝復更作蟄蟲來見流水不冰熱病行於下風
病行於上風燥勝復形於中熱化寒化勝復同所謂邪

氣化日也風化八清化四火化二所謂正化度也毛蟲
靜羽蟲育是迺歲物所宜介蟲毛寒毒不生是迺地氣
所制然木為天氣火為地氣金運在中地氣勝運運化
勝天天氣虛地氣實宜資化源以助木氣兼贊歲運无
使邪勝其化上辛涼中酸和下鹹寒所謂藥食宜也歲
半之前天氣厥陰主之厥陰以中氣為化當其時風從
火化者天氣之和也若風淫所勝則太虛埃昏雲物以
擾寒生春氣流水不冰民病胃脘當心而痛上肢兩脇

膈咽不通飲食不下舌本強食則嘔冷泄腹脹溏泄痼
水閉病本於脾診在足衝陽之脉法宜平以辛涼佐以
苦甘以甘緩之以酸瀉之歲半之後地氣少陽主之少
陽之化從本若火淫于內則焰明郊野寒熱更至民病
注泄赤白少腹痛溺赤甚則血便法宜治以鹹冷佐以
苦辛以酸收之以苦瀉之歲運之化金不及紀曰從革
是謂折收收氣迺揚長化合德火政迺宣庶類以蕃其
氣揚其用燥切其動鏗禁脅厥其發欬喘其病邪傷

肺其化兼所不勝夏有光顯鬱蒸之令則冬有嚴凝整肅之應若夏有炎爍燔燎之變則秋有冰雹霜雪之復其青西其藏肺其病內舍膺脇肩背外在皮毛復則寒雨暴至迺零冰雹雪霜殺物陰厥且格陽反上行頭腦戶痛延及額頂發熱甚則心痛宜治以酸和調中初之氣自甲辰年大寒日己初至是歲春分日卯初凡六十日八十七刻主位太角木 客氣陽明金中見金運氣與運同居於木位與厥陰交司而行春令金木氣齊

寒始肅殺氣方至民病寒於右之下宜治陽明之客以
酸補之以辛瀉之以苦泄之歲穀宜蒼間穀宜黍是氣
也司氣以涼用涼無犯二之氣自春分日郊正至小滿
日丑正凡六十日有奇主位少徵火客氣太陽水中見金運金水
相得寒不去華雪水冰殺氣施化霜迺降名草上焦寒
雨數至陽復化民病熱於中宜治太陽之客以苦補之
以鹹瀉之以苦堅之以辛潤之歲穀宜蒼間穀宜稷三
之氣自小滿日寅初至大寒日子初凡六十日有奇主

位少徵火客氣厥陰木中見金運火勝金金勝木天政
布風迺時舉民病泣出耳鳴掉眩宜治厥陰之客以辛
補之以酸瀉之以甘緩之歲穀宜蒼間穀宜稻四之氣
自大暑日子正至秋分日戌正凡六十日有奇主位太宮
土客氣少陰火中見金運火勝金溽暑至濕熱相薄爭
於左之上民病黃痺而爲肘腫宜治少陰之客以鹹補
之以甘瀉之以酸收之歲穀宜丹間穀宜豆五之氣自
秋分日亥初至小雪日酉初凡六十日有奇主位少商